

武夷山志卷之十九

武夷董天工典齋編集男勅校刊

古蹟

虹橋板

大王峯昇真洞外有木板縱橫插於巖際相傳武夷君設宴幔亭時架虹橋以引鄉人及下橋遂斷其板飛插各峯石罅迄今大小藏峯鼓子峯金鷄洞諸處皆有之風雨飄搖歲久不腐人亦莫能取間有自墜者色黝而澤類沉香文理堅栗不辨何木土人珍之云能除胃氣痛辟火災祛邪崇焉

武夷山志

卷之十九

古蹟

一

望虹橋板

明 吳道新

度閣連鰲駕海山津梁特爲度鄉闕扶桑木自曦輪斫叢桂枝經月斧刪朱栴丹楹由太古綃宮貝闕在人間分明鸞鶴還來往斷靄殘虹不可攀

虹橋板

徐 燝

虹橋當日晏曾孫千載還餘片板存堅比插空孤嶂色香同委地落花魂輪困莫是靈椿幹枯槁疑爲若木根細認群仙行步處依稀猶見草鞋痕

虹橋板

國朝 吳應聘

丹鼎騰空木亦仙斷橋飛上共雲懸不堪虹氣藏幽壑夜

夜峯頭吐紫煙

虹橋板

韓奕

仙洞遺蹤不記秋懸崖千尺浸溪流飛橋幻術渾多事斷  
板參差空自留

集詩經題虹橋板

李卷

天作高山克峻克嶷洵美且武云胡不夷惟石巘巘倬彼  
雲漢豈伊異人誕先登于岸爛其盈門肆筵設席如川之  
方至爲賓爲客曾孫之慶小大稽首不吳不敖在帝左右  
鼓瑟吹笙樂且有儀旣醉而出廢徹不遲風雨如晦胡逝  
我梁顛之倒之于彼高岡其比如櫛視爾夢夢於萬斯年

武夷山志

卷之十九

古蹟

二

不震不動其爲飄風或降于阿率陵幽草云如之何采薇  
采薇邂逅相遇爰笑爰語厥聲載路我其收之如取如携  
必恭敬止如璋如圭惠于朋友旣堅旣好罄無不宜以作  
爾寶譬彼壞木金玉其相如切如磋休有烈光實維何期  
相在爾室用戒不虞有如皎日我之懷矣其在于今辭之  
輯矣以矢其音

虹橋板歌

板爲崇安潘秀才  
在東所贈

查慎行

潘生昨朝贈我虹橋板云此購得從仙山幔亭宴罷橋忽  
斷此木度在萬仞之孱顏蒼鷹健鶻對對巢不得但見成  
群接臂叫跳猿猴獠黃冠白足力歎致間出麋者相欺謾

有時晦冥晝風雨神物欲降天爲慳前者偶經此巖下巖前白浪吞船豚忽驚片板半空落有若胎禽墮毳輕飛翾主人大笑童僕嘉謂獲至寶非空還已令巧匠刻爲佩辟易魑魅馭妖姦知君好竒特分贈徑尺未許酬千鍰我時聞斯語未敢相譏訕今晨入武夷好事搜險艱生爲指其處乃在一曲二曲三曲灣初疑棧道上露出船尾彎又如鳥鼠穴竹箭亂插同榛菅神輸鬼運義奚取徑路斷絕誰躋攀忽憶少年日南走五溪窮百蠻蠻人寄命巖洞裏多構柴柵臨崢嶸今之所見正此類亦如桃源之客避亂來其間不然飈輪雲馭本飛渡豈有剗木留塵寰摩挲重是

武夷山志

卷之十九

古蹟

三

千歲物肌理駁蝕生香斑携歸壓書儘有用何必新竒瓌詭驚愚頑

架壑船

船長約二丈許中濶首尾漸狹類梭形傳爲圓木剗成且具棹楫然遙望之弗能詳也李磊英云舊志載武夷仙船凡七在昇真洞者四兜鍪峯者一小藏峯者二然不止此兜鍪或云二艇此外更有六艇一在金鷄洞三在鷄窠巖一在真武洞一在小藏峯北壁穴中東壁所見架壑船舊有四明萬曆丁巳夏墜其一內貯磁噐隨皆糜碎好事者爭藏其板嗅之微香國朝康熙辛亥秋又墜其一今所存

者小藏凡三又按程應玄所見金鷄洞內貯香一船及今  
洞口所懸蓋亦二艇又傳白雲洞有一艇是其數通計爲  
十六矣不知尙有未盡否

仙船

宋 陳夢庚

此船何事架巖隈不逐浮槎八月來莫是飛仙無所用乘  
風有路到蓬萊

仙船

明 卓思茂

幔亭橋斷已多年最是曾孫舉世憐苦海無邊誰到岸虛  
舟何事獨凌烟溪頭漁艇桃源隔天上星槎銀漢懸諒有  
濟川風信便不愁弱水路三千

武夷山志

卷之十九

古蹟

四

架壑船

孫朝讓

依稀鷁首嵌崖隈云是仙人權得來風雨任摧金石固星  
河宜泛混濛開牽將野岸元非屋寘向均堂應似盃何用  
强人姑妄語箇中詭異竟誰猜

仙蛻

武夷仙蛻現可見者四大王峯之張垓徐熙春杜葛巖之  
程艮初水簾洞之王廣而已明萬曆時直指楊四知見張  
裸裎近褻因而裝塑今骨全掩徐與王亦塑而口耳手際  
稍見其骨齒皆宛然惟程艮初裸體無飾俯首趺坐俗稱  
草鞋仙者是也

仙蛻

宋 李仲光

晝夜本循環天地均此理人生出入機晝夜差可擬仙家  
學蟬蛻脫然遺腐胔白骨尙珍藏似未忘生死

仙蛻

明 李有則

弱水沉羽毛蓬萊隔塵路雖無長鯨波猶自濛烟霧仙人  
非室居形成緣氣聚閉戶可採藥何必容顏遇凡心萬劫  
迷神理千年悟日與仙人俱何益夢與寤武夷鍾靈竒蛻  
骨堪指數古洞遺丹爐寒灰尙如故瞻望諒非遙步趨恐  
遲暮願將玄秘理輔世還太素歸來煉丹砂憩坐瓊宮樹

遺骸

武夷山志

卷之十九

古蹟

五

諸志云大王峯之昇真洞有五壩皆盛蛻骨又有四船相  
覆以盛仙函函共二十有餘空者數函又張仙巖一函白  
骨不全換骨巖九函仙釣臺真武洞三函白雲巖右洞數  
函大藏峯石罅中十六函小藏峯有黃心木槽藏十三仙  
蛻骨紹聖端平間迎魏王顱骨至太乙宮祈雨不崇朝而  
沛降又云迎魏王顱稍弗虔輒飛去又云禱雨畢則仙蛻  
自返故處後爲孕婦所厭今雖靈不復飛上矣又萬曆間  
接筭峯道士程應玄曾至金鷄洞中云內藏南木甚多一  
長三丈徑尺餘上置仙蛻十三函每函或顱骨數片或脛  
骨一二莖子骨一二節皆裹以錦帕一函乃鶴骨惟頭及

一足又一舟楠木剝成長丈餘濶三尺許內盛香末如細羅洞中香灰纍纍成堆按諸峯雖有遺骨何所據而爲仙小藏金鷄皆有十三函又何所據而指小藏爲十三仙之骨子騫旣更衣上升安得復有頭顱傳世謝在杭云神仙暫遊萬里少別千年世間一切事棄如敝屣乃復愛護委蛻不合朽腐則見其解反不若蛇蟬之屬脫然無累矣余謂神仙不食人間煙火未必尙愛遺骸子騫顱骨初之飛不知果否而今之不飛則眞不飛也然文公權歌武夷山上有仙靈則仙骸又不容不脩錄也

遺蛻

元沙中子

武夷山志

卷之十九

古蹟

六

武夷別是一區寰咫尺蓬萊手可攀一葉輕舟九曲水數聲啼鳥萬重山雲崖天近嵐長濕石洞春深蘚自斑莫道仙凡相去遠幾多蛻骨在巖間

仙機

四曲仙機巖西壁有木一橫兩豎形如甘字相傳謂仙機釣竿

四曲金鷄洞口豎一竹竿儼然垂綸風吹不落雨濯不朽  
栲木樓

八曲鼓樓洞內有栲木樓高廣三四尺許規制精巧見者驚猶鬼神傳是飛來陳幼溪曾至洞中記木樓云窻櫺甃

瓦無非木製釘頭露木外者半寸測爲千百年物李懷之  
云萬曆庚申夏大風雨鼓樓洞中木樓飛出越三仰峯而  
去土人目擊者甚衆落一礎如棋子大道士黎望雲者拾  
得之珍藏傳玩甚久

雜錄

游三蓬秦時人少孤與弟乞奴漁一日泊梅溪渡口有老翁甚藍縷求渡叩其所往曰皇太姥將宴群仙能從我遊乎蓬兄弟幸甚翁令瞑目坐舟中但覺蓬蓬如飛有頃聞鶴唳竊視之則舟已擱巖間矣遂與衆預幔亭之宴游自是絕粒或言今三曲架壑船即其所棹也

見晉

安逸志

浦城楊文公億將生時母章氏夢羽衣人自言武夷仙托化既誕則一鶴雛也舉室驚駭棄之江叔父曰吾聞間世之人其生必異乃追至江濱發視之已蛻爲嬰兒其

武夷山志

卷之十九

雜錄

八

體猶有毛長尺許經月乃落

見建寧府志

崇安劉侍郎夔少隸業山中一夕方觀書忽有手藍色毛穆穆然自窓隙入爲剔燈公遽執而署以押叱使去曰不能去矣乞侍郎去所書公拭之乃去

見夷釋生志

宋天聖二年二月朔夜忽大風雷雨石堂寺巖崩地陷僧果緣與鄉人詹立等懼伏壓死惟僧居仁行者子明子雲獲免黎明鄉人至群見居仁坐於先師塔前李木下如寐呼之始覺自言爾時若有人挾去不知何以在此仁方嘆僧牒毀失忽從水上漂來衆咸異之或曰先是鼓樓巖有仙蛻又有一山羊常遊食院側詹立等煨蛻

爲齒藥又捕山羊食之人以爲致禍之由云

見徐德望  
武夷志

浦城楊正臣天聖進士授南安尉稱疾去至武夷一日有道人來謁投刺曰張湛然正臣館之南園是夜月明如晝道人瀟洒長嘯忽雙鶴飛來跨之而去衆始悟爲十

三仙中張湛也視其刺乃白紙耳

見浦城志

治平間大早有土人江小三者灌田均峯下遇三女授小葫蘆盛水令灑之大雨如注越數日江往謝緣徑深入有洞府榜曰雲虛之洞有金字朱牌題曰太素孔元君太微莊元君太妙葉元君

見方外

仙童導引三女出見以胡麻飯食之告之曰我本會稽上虞人唐天寶時來學

## 武夷山志

### 卷之十九

雜錄

九

道得仙於此語畢指路送出夾徑桃花渡一小澗則三姑石下至家已三載矣

見崇安志  
武夷換骨洞

按查孔莊葉即今  
三皇元君是也

紹聖二年修建武夷宮殿落成八月辛巳安武夷君像於新殿是日有白鶴三十二飛鳴而下翔舞於庭至暮望昇真洞而去

見武夷志錄

紹興初有黃樸者

見方外

自樵川來武夷訪仙無所遇忽於

白雲巖下見草庵有道姑屏處色殊麗問樸來故因曰洞天無形仙豈可覓乎日將暮君且止此樸曰汝婦人獨處於義不可姑曰此地多虎恐君見傷樸不聽坐於戶外夜半虎果至姑開門呼之卒不肯起堅坐達旦虎

潛去姑曰君真有志者洞天去此不遠乃指以徑且曰溪深不可渡遇樵者當拜求之樸如其言樵者愠曰是嫗如許饒舌遂令樸閉目挽其衣倏忽過溪則見宮殿崔嵬不可名狀一人碧玉冠絳袍雲履坐殿上命左右引樸至前曰汝何人輒至此宜速回積功累行他時或可再來乃食以胡麻飯遣之出至崖下回望高山深谷窅非初境道姑與庵亦失所在

見崇安志

咸淳間蜀人彭澹軒罷江東倅遊武夷嘗獨行林藪入草庵見兩人峩冠博帶容貌迴殊方對食招彭共坐俎中豕首一羊脯一鷄一所言皆先天圖易性理之學彭心

武夷山志

卷之十九

雜錄

十

敬之請姓字右坐者云姓魏野叟無字左坐者不荅至暮辭歸明日再往竟不得其處告諸人云昨祭朱子祠

此正俎中之餚乃悟左者爲晦翁右者魏鶴山也

見異聞摭

錄

東陽人黃咸中

見方外

宿止止庵夜半遇道人坐石上呼曰

汝名在仙籍乃授以秘書及方寸銅印曰佩之可濟世延年時有彩雲捧月因令咸中更名慶雲約七十年後再會問其姓名曰東南子遂凌空而去

見舊志

楊萬大崇安人結茅武夷漁樵山水間一夕有道士扣門求宿後數往來一日謂萬大曰吾非世人今當歸洞天

觀汝所爲甚善盍偕我去萬大曰吾二親未葬豈可去  
道士曰待爾襄事未晚遂共舟至甌寧豐樂里指一處  
曰某年月日奉柩至此視白狸眠處即葬所伺其起即  
葬時萬大及期徃果如所言後萬大年九十七晝寢夢  
前道士來迎曰汝今可以去矣覺即沐浴更衣端坐而  
逝楊族甚蕃因名其地曰楊墩墓曰白狸窩明太師楊  
文敏公榮萬大之後也

見甌寧志

張潞公翥嘗奉使經武夷所歷悉如舊遊心甚怪之繼至  
一石室有道人坐化其中形體如生忽悟爲其前身慟  
哭而返因自號蛻庵詩曰蛻庵集

見江仲魚武夷志

武夷山志

卷之十九

雜錄

十一

潞公字仲舉元時襄陽人福建通志載憲副張翥乃濟寧人洪武間任蓋別一張翥非潞公也

成化間有鄉民削竹籤插仙船巖壁攀緣而上見船中貯  
銅盆一內金魚二尾游泳白若駭下告人不信憇之再  
登令携囊取盆下羣聚觀巖麓見已擎盆置囊中矣忽  
一鷹猛下自手攫囊冲雲而沒民驚墜幾斃

見高卧雜錄

嘉靖間有田父于武夷天柱峯下遇一樵者坐譚久之問  
父曾見仙乎父曰未也所謂仙窟特虛語耳樵者笑出  
袖中詩一紙與之其詩云曾買金陵酒一卮與君相共  
話玄機壺天有路容人到凡骨無緣化鶴飛莫道烟霞  
愁縹緲好將鄉國認依稀可憐寂寞空歸去休向紅塵

說是非以紙示人忽風過字迹皆滅父自是不食不眠  
浪迹雲水不知所終

見江志

榕陰新檢載福州安翁嘗遇仙贈以畫所題即此詩也

嘉靖間星村藍原居人將毒溪以取魚有老人鬚髮皓然  
詣首事之室曰九曲溪不可毒中有神物居之其人曰  
藥已具矣衆蜂集吾一人豈能阻老人悼嘆不已留饈  
辭以持齋乃以豆腐及莧菜進食已謝去衆放藥得大  
魚重百餘觔剖之見豆腐莧菜在焉衆驚悔不數日首  
事暴卒尋大疫死者甚衆

見寐齋集

萬曆丁丑三月崇安民張富郎者自大藏峯頂設轆轤緹

武夷山志

卷之十九

雜錄

十二

險至金雞之上洞見滿洞香灰數人鼾睡其內傍覆一  
銅磬揭視之磬下一鷄奮起翼展灰飛不能仰視有頃  
開目則人與鷄俱失所在倉皇而下風雨暴至張時年  
八十餘

見舊志

昔有平川人操舟過卧龍潭見漂板上積鷹矢知是虹橋  
板取而濯淨置諸舟中移數棹顧之已失矣仰睇則在  
金雞洞口水濕猶滴因驚異告人謂神物不可妄得如

此

見姑留草

金雞洞有鐵香爐可三百觔傳爲嘉靖甲午歲飛來云又  
戊戌夏李中溪江午坡諸公遊武夷舟過洞下見洞中

有一物丹朱爛灼狀如香奩大可六七尺許相顧駭愕  
李公作記謂伊誰置之真不可解矣見徐氏筆精

翁東崖以僉都請告歸遊武夷至五曲遇一人揮手曰別  
久矣巖下授受秘語解公大阨乎今可回頭矣言已忽  
不見公恍然趣歸遂卒於舟中及柩抵家啟視之眉宇

欣欣如生云見湧幢小品

邱止山解組歸棲武夷山閉關講學與其友宿高明樓夜  
有怪倚門作人語曰同游不亦樂乎何卧之早也止山  
應曰我載晨而遊抱日而歌汝胡不吾和而同其樂何  
爲昏暮而來也怪應曰不能止山曰吾亦不能怪嘆息

武夷山志

卷之十九

雜錄

十三

而去見明綜詩

附錄

公移

五曲書院祠田

巡按福建監察御史周爲修理先賢祠宇事照得本院按臨之初據崇安建陽二縣各掌印官及二學師生廩稱武夷五曲舊有先賢朱文公祠堂一所即今年久倒塌應合修理等情後該本院親臨彼處逐一檢視知果是實切照大賢祠堂若使傾壞不修則無以崇尚先德風勵後學係屬人心但今地方多事百姓貧乏難以科派所計前祠合用木石磚瓦等料該用銀兩本院自行措處其該用人夫亦不必起點鄉夫止將現在民快量

武夷山志

卷之十九

附錄公移

十四

用四五十名輪流仍給與食米庶不費民財不妨民力而功亦可就爲此除將畫成式樣一張粘發前來外仰抄案回府着落當該官吏照依案驗後開條件事理即便差委估計營辦應役興工施行正德十三年十月

日

正德十四年十一月十五日崇安縣蒙察院周發放仰將范廷剛原入官田九十石四斗取具各人親供內抽四十石湊章經田六十石共一百石入武夷朱文公祠餘下五十石四斗均撥與胡文定公蔡九峯二書院各得二十五石二斗汝該縣自區處施行本縣遵照原蒙

定撥田土備查各佃耕作田段畫圖貼說弁先賢子孫  
照管田苗數目備由粘繳開坐申乞施行計開 武夷書  
院戶民田一百畝糧米四石該苗米一百石附本縣在  
城九畝十甲里長下一應差役悉皆優免

物產

藝屬

茶 茶之產不一崇建延泉隨地皆產惟武夷爲最他產性寒此獨性溫也其品分巖茶洲茶附山爲巖沿溪爲洲巖爲上品洲次之又分山北山南山比尤佳山南又次之巖山之外名爲外山清濁不同矣採摘以清明後穀雨前爲頭春立夏後爲二春夏至後爲三春頭春香濃味撮二春無香味薄三春頗香而味薄種處宜日宜風而畏多風日多則茶不嫩採時宜晴不宜雨雨則香味減各巖著名者白雲天遊接笋金谷洞玉華東華等

武夷山志

卷之十九

物產  
藝屬

十六

處採摘烘焙須得其宜然後香味兩絕第巖茶反不甚細有小種花香清香工夫松蘿諸名烹之有天然真味其色不紅崇境東南山谷平原無不有之惟崇南曹墩乃武夷一脈所產甲于東南至于蓮子心白毫紫毫雀舌皆外山洲茶初出嫩芽爲之雖以細爲佳而味寔淺薄若夫宋樹尤爲希有又有名三味茶別是一種能解醒消脹巖山外山各皆有之然亦不多也

謝尙書惠蠟面茶

唐  
徐 夤

武陵春暖月初圓採摘新芽獻地仙飛鵲印成香蠟片啼猿溪走木蘭船金槽和碾沉香末水椀輕涵翠縷烟分贈

恩深知最異晚鐙宜煮北山泉

和章岷從事鬪茶歌

宋 范仲淹

年年春自東南來建溪先暖冰微開溪邊竒茗冠天下武夷仙人從古栽新雷昨夜發何處家家嬉笑穿雲去露芽錯落一番榮綴玉沍珠散嘉樹終朝采掇未盈檐惟求精粹不敢貪研膏焙乳有雅製方中圭兮圓中蟾北苑將期獻天子林下雄豪先鬪美鼎磨雲外首山銅瓶携江上中冷水黃金碾畔綠塵飛紫玉甌心雪濤起鬪茶味兮輕醞翻鬪茶香兮薄蘭芷共間品第胡能欺十日視而十手指勝若登仙不可攀輪同降將無窮耻吁嗟天產石上英論

武夷山志

卷之十九

物產  
藝屬

十七

功不愧階前莫衆人之濁我可清千口之醉我可醒屈原試與招魂魄劉伶却得聞雷霆盧同敢不歌陸羽須作經森然萬象中焉知無茶星商山丈人休茹芝首陽先生休采薇長安酒價減千萬成都藥市無光輝不如仙山一啜好冷然便欲乘風飛君莫羨花間女郎只鬪草贏得珠璣滿斗歸

咏茶

蘓軾

君不見武夷溪邊粟粒芽前丁後蔡相寵加爭新買寵各出意今年鬪品克官茶吾君所乏豈此物致養口體何陋耶洛陽相君忠孝家可憐亦進姚黃花

咏頭春貢茶

元 劉說道

靈芽得春先龍焙收竒芬進入蓬來宮翠甌生白雲坡詩  
咏粟粒猶記小時聞

咏武夷茶

杜 本

春從天上來嘯拂通寰海納納此中藏萬斛珠蓓蕾

咏貢茶

林錫翁

百草逢春未敢花御茶蓓蕾拾瓊芽武夷真是神仙境已  
產靈芝又產茶

見貢頭春漫成

明 蘓伯楨

采采金芽帶露新焙芳封裹貢楓宸山靈解識君王重土

武夷山志

卷之十九

物產  
藝屬

十八

脉先回第一春

酬藍茶仙見寄先春

丘雲霄

靈雨開仙圃春風長玉芽摘來旗葉捲封處墨題科品落  
龍團翠香翻蠓眼花欲移三徑地從此遍栽茶

藍素軒遺茶謝之

御茶園裏春常早辟穀年來喜獨嘗筆陣戰酣青疊甲騷  
壇雄助綠沉槍波驚魚眼聽濤細烟暖鴟罌坐月長欲訪  
踏歌雲外客注烹仙掌露華香

湛翁送茶

翡翠春巢瑶圃枝欣看雀舌展新旗甕中存有經年雪入

鼎休傳到黨姬

寄容菴弟索茶

仙種先春仙已去採春長夢望仙亭  
老來仍抱通靈癖雪水空留滿瓦餅

閩茶曲

明 周亮工

御茶園裏築高臺驚蟄鳴金禮數該  
那識好風生兩腋都從著力喊山來

一曲休教松栝長懸崖側嶺展旗槍  
茗柯妙理今爲崇十二真人坐大荒

謝送武夷茶

國朝 彭定求

武夷山志

卷之十九

物產 藝屬

十九

芒屨何緣到武夷揀芽相餉等瓊枝  
却宜鴻漸烹泉日絕勝龍團作餅時  
石鼎香浮涵素液冰壺色映淨炎曦  
使君風味情如許續取歐梅唱和詩

謝王適菴惠武夷茶

沈 涵

雀舌龍團總絕群驛書相餉意偏殷  
香盞玉女峯頭露潤帶珠簾洞口雲  
不用破愁三萬酒慙無拄腹五千文  
呼童携取源泉水細展旗槍滿座芬

武夷茶

陸廷燦

桑苧家傳舊有經彈琴喜傍武夷君  
輕濤松下烹溪月盞露梅邊煮嶺雲  
醒睡功資宵判牒清神雅助晝論文  
春雷

催茁仙巖笋雀舌龍團取次分

武夷茶賦

饒澤殷

夷山競勝曲水矜誇萬壑流清滋榮瑞草千峯萃秀產茁  
香茶名推玉乳品羨金沙開山闢地兮遍栽嘉種軒荆芟  
穢兮好護玉華老幹長新枝盤根常看爛熳白花方吐蕊  
香芬更羨清葩百草尙未芳叢先春凍雷驚筍羣林猶未  
舒翠及時穀雨抽芽手亂人忙終朝不盈一掬前呼後隊  
遍地何啻千家發葉當春暖盈筐盡日科操筥携籃攀授  
隴畔蓬頭跣足踏遍林柯採摘帶嚴霜膚寒指冷爰求沾  
苦雨荷笠披簑雨暗晴嵐均深永嘆風清日朗遍聽高歌

武夷山志

卷之十九

物產  
藝屬

二十

金井坑泉徹放涼芳叢倍添氣味玉女峯頭迎曉霧新英  
更羨猗猗秋露蘭花和雨滴拘香鷹嘴帶甜過虎嘯巖前  
酪奴應爲驚出龍吟洞口雀舌更自喧和雲窩繞洞兮薰  
蒸釀氣接筍懸梯兮攀摘煩疴金鷄洞唱五更寒家家燈  
火連深夜卧龍潭靜三更月戶戶人聲徹僻窩焙芳不須  
活火炒葉只用溫鍋清香味取醇撮白毫品羨麼麼炒青  
研玉液醞綠泡松蘿碾細香塵起烹新味噴呵數番活水  
沸蝦鬚曾到一嘗喉下閨半勺甘泉浮蟬眼何須三峽水  
中科龍團鳳髓香殊異雪葉雲英味太和兩腋生風欣添  
逸興幾杯消暑快任吟哦縱有世情珍百味那知茶品快

人多

篁屬

毛竹 生一曲毛竹洞每節旁生枝枝之巨細與幹等異種也

方竹 遍山皆有之幹正方八月生筍味甚甘

雙幹竹 生七曲城高巖寺後出土尺許分兩枝直上亦名同根竹今無

同根竹

元謝宗可金陵人

競秀亭亭一種奇駢頭曾脫錦裯兒西山二子情依舊湘浦雙娥影自隨高節元非連理樹虛心共是傲霜枝莫教

武夷山志

卷之十九

物產 篁屬 果屬

二十一

移作仙人杖恐化雌雄下葛陂

筇竹 一名鶴膝竹又名淨瓶竹節大而莖細最宜杖生

山北章堂巖一帶

湛翁携鶴膝竹杖贈別藍原之上 明丘雲霄

鶴膝逢仙授龍筇得舊傳葛陂憐往事藍澗紀何年登眺交盟重煙霞引興偏從來神物異不敢渡延川

果屬

小李 生大王峯頂形如小鳥卵稍長而色亦味甚美

山荔枝 亦生大王峯密實叢生味頗類晉安者但差小

耳

仙橘 小者如彈丸皮可食大者如鷄卵味甚甘美亦生  
大王峯頂花實不與恒橘同時故以仙稱

酬劉白雲五月登大王峯絕頂得仙橘數十顆見遺

歌其事異之

明 丘雲霄

孤峯萬丈摩青空懸猿飛鳥愁力窮丹崖翠壁擁蓬島白  
雲紫霧相裊花開花落非人世巖頭五月垂橘紅世人  
俗眼不得見況能顆落歸懷中朱囊碧蒂醉香露瓊肌玉  
液搖春風洞庭霜後不足數蓬萊殿上空筠籠偷桃曾傳  
漢方朔歲星左謫爲臣工攀登直是有仙骨却憐野老非  
方瞳我今旣已食仙實刀圭入口能成功竹冠蘭佩衣薜  
武夷山志 卷之十九 物產 蔬屬 二十二

蔬屬

焯菜 辛菜也冬月布地叢生二月開細黃花結細角內  
有子味甚辛辣洪舜俞老圃賦云焯有拂士之風林洪  
山家清供云朱文公飲後輒以焯莖供蔬品也

焯次公濟惠山蔬

四首之一 宋 朱 熹

靈草生何許風泉古澗旁褰裳勤采擷枝筍噀芳香冷人

玄根閔春歸翠穎長遙知拈起處全體露眞常

焯菜次劉秀野蔬食十三韻之一

小草有眞性託根寒澗幽儒夫曾一噉感憤不能休

藥屬

石菖蒲 一名昌陽又名昌歎其種有二大而生水次濕地者其根盤屈有節狀如馬鞭不堪服食小而生石磧者葉如劍脊一寸九節乃本草所謂久服輕身益智不老者也山中間一有之不可多得劉學箕贊曰茸其髮劍其脊露葉凝泉雲根絡石英英塵俗之表濯濯丰神之特稜稜林壑之秀戢戢澗溪之質茲蓋飽九秋之煙

武夷山志

卷之十九

物產  
藥屬

二十三

霏擅千巖之叢碧者也

謝劉彥集菖蒲之貺二首

宋 朱 熹

君家蘭杜久萋萋近養菖蒲綠未齊乞與幽人伴岑寂小窗風露日低迷

泉清石瘦碧纖長秋露懸珠炯夜光箇裏無窮閒造化別來誰與共平章

茯苓 老松根底徃徃有之以成形者爲佳

致明贈茯苓如嬰孩狀以詩爲報 劉子翬

老松寒不死密壤聚流脂小鬪凌蒼翠深藏發怪奇應憐雙鬢老爲寄玉嬰兒屑餌消殘疚同尋汗漫期

禺屬

王孫 似猴而小大僅如拳朱文公山中詩王孫遠相喚  
韓元吉武夷精舍記山故多王孫是也

禽屬

白鷗 狀類雉大倍之白毛黑緣爪喙皆丹韓元吉武夷  
精舍記云鳥則白鷗鷓鴣聞人聲或磔磔集崖上散漫  
飛走而無驚懼之態

白鷗詩

明徐渭

閩南煙雨迷青嶂孤雌挾子飛天上却憶羈雄不得歸兩  
漿深籠鏡波漾片雪長梢向尾分有時夢見武夷君山長  
武夷山志

卷之十九

物產 禽屬 花屬 草屬 二十四

水遠無書寄不及南飛鴻鴈羣主人爲爾苦惆悵開籠欲  
放非難放矰繳鷹鷂何處無萬里憑誰報無恙  
鷓鴣 形似牝雞臆前有白圓點背毛有紫赤浪文鳴云  
鈎輞格磔俗謂爲行不得也哥哥

花屬

風蘭 根不着土叢蟠木石間取懸簷際受風則茂羣芳  
譜云隨風飄揚冬夏長青可稱仙草

草屬

巖松 一名萬年松草之似松者高三四寸生崖壁間採  
之可作盆供久藏枯瘁得水即青翠復活

武夷山產二首

明方以智

采藥閒相訊提籃各一莖巖肝因雨長石斛挂風生山樓  
涎成紙櫻魚椒作羹獨餘溪上葑居者未知名

巖肝石菌也葑菜山樓小樹有涎抄紙櫻  
魚櫻笋也葑菜辣朱子所食有詩

城高雙幹少鶴膝出章堂方笋供秋興枏皮結異香老君  
筋益氣千里菊堪囊鐵線凌冬發幽蘭意味長

城高雙幹竹今無矣鶴膝一名淨瓶方竹以  
秋出笋老君筋藥名千里菊即萬年松也

武夷山志卷之十九終

武夷山志

卷之十九

物產

二十五